

佛说旃陀越国王经 1 卷

No. 518

佛说旃陀越国王经

宋居士沮渠京声译

闻如是：

一时，佛在舍卫国祇树给孤独园，与千二百五十比丘俱。

时有国王，号名旃陀越，奉事婆罗门道，王治国政辄任用诸婆罗门。

王小夫人，特见珍重，时兼娠。诸夫人憎嫉之，以金赐婆罗门，令谮之于王言：「此人凶恶，若其生子，必为国患。」

王闻之，甚愁忧不乐，问婆罗门言：「当如之何？」

婆罗门言：「唯当并杀之耳。」

王言：「人命至重，何可杀之？」

报言：「若不杀者，必有亡国丧身之忧，祸不细也。」

王便听用其言，遂见枉杀，便葬埋之。

儿后于冢中生，其母半身不朽，儿得饮其湫，乃至三年，其冢崩陷，儿后得出，与鸟兽共戏，暮即还冢中宿。

儿时年六岁，佛以普慈，念其勤苦与鸟兽同群，即化为沙门，被服往呼，问之言：「汝是谁家子？居在何处？」

儿欢喜报言：「我无家居，但栖宿此冢中耳，今乞随道人去。」

佛言：「汝随我去，何等为乎？」

儿报言：「我今善恶，终当随道人。」

佛便将其到祇洹中，见诸比丘威仪法则，意甚乐之，便白佛言：「我欲乞作比丘。」

佛即听之，以手摩其头，发堕袈裟自然着身，名为须陀，从佛受尊戒，勤意精进，心不懈怠，七日便得罗汉道。

佛语须陀：「从佛受尊戒，拔欲之根本，生死得自在，今宜往度彼旃陀越王。」

须陀承佛教，头面着地，为佛作礼，往到其国，住在宫门，请见于王。臣下白王言：「外有道人，乞欲见王。」

王闻之即出，与相见，问言：「我大有所忧者，当如^如之何？」

道人言：「何所忧耶？」

王言：「我年已长，且欲过时，国无续嗣，为之愁忧。」

道人闻王语，初不应之独笑而已。王便恚言：「我与道人语，初不答我，而反独笑，即欲治杀之。」

须陀知其意，便轻举飞翔，上住空中，分身散体出入无间。王见其威神变化，即恐怖悔过言：「我实愚痴，不别真伪，唯愿大神一还，令我得自归命。」

须陀即从空中下住王前，谓王言：「若能自归甚善，当自归于佛，佛是我大师，三界之尊，度脱众生。」

王便勅群臣，严驾当到佛所，须陀便以道力，如申臂顷，将王及人民，俱到佛所，头面着地，为佛作礼，归命三尊，乞受五戒，为优婆塞。

佛告王言：「欲知比丘须陀者，是王昔所用婆罗门言譖，杀兼娠者子也。母死之后，子于冢中生，冢中母半身不朽，得饮其湏，乃至六年，今随我为道，乃致于此。」

王闻佛言，更恐怖不能自胜。

佛言：「昔拘先尼佛世，有国王号名佛舍达，王及国中三亿人，皆随王供养三尊。时有凡人，居贫无业，常为国中富姓赁放牧，养牛数百头。见王及人民供养比丘僧，即问言：『卿等何所为乎？』人民答言：『吾等供养三尊，后当得其福。』即复问言：『得何等福耶？』人民报言：『人有净心施三尊者，后所在处安乐尊贵，无有勤苦。』即念言：『我居贫穷，但赁放牧，自无饮食，当何以施？』即念言：『唯当还取牛湏，煎以为酪酥，净心上比丘。』比丘僧祝愿言：『令汝世世所在处当得其福，自后展转更生死，辄受其福，或上为诸天，或下为王侯。』

「乃后为王时出游猎，见国中人有好犝牛怀犊，王便令人取牛杀之。夫人语王：『莫令人杀其子也。』时牛主追还，破取其子养护之。其主恚言：『当令王如此牛也。』自后魂神来为王作子，时未出生，母为王所杀。欲知须陀者即是也；须陀母见枉杀者，则是时王夫人也；婆罗门者牛主是也。须陀所以于冢中生，其母半身不^朽，得饮其湏以自长大者，由其宿命以酪酥上比丘僧故。」

佛言：「罪福响应，如影随形，未有为善不得福，行恶不受殃者。」

王闻佛说经，意解即得须陀洹道，国中人民皆随王奉五戒，行十善，归命三尊，或有得须陀洹、斯陀含、阿那含、阿罗汉者。四辈弟子、天龙鬼神，闻经欢喜，前为佛作礼而去。

佛说旃陀越国王经

【经文信息】大正藏第 14 册 No. 0518 佛说旃陀越国王经

【版本记录】CBETA 电子佛典 Rev. 1.13 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
